

Part tre - Jë strument òtich - Le matris

An costa part is ocupoma prima 'd com a fonsion-a l'euja e peui i vardoma 'l fonsionament da na mira dl'òrica geométrica, dle lent, ij microscòpi, ij canuciaj, ij telescopi, j'obietiv fotogràfich e ij projetor. Tut sòn, coma sempe, sensa andé trop ant l'ancreus. I disoma peui quaicòs an sla arpresentassion dle proprietà dij sistema òtich dovrant le "matris èd trasferiment" dij ragg, che dle vire a arzulto esse motobi còmode. Coma esempi 'd matris i comensoma a acené a l'arsonador òtich che i artrovroma ant la part "eletrònica" a propòsit dij laser..

TÀULA DLE FIGURE DLA TERSA PART

Jë strument òtich.....	153
Com as forma l'imàgin ant l'euja.....	153
Microscòpi sempi	154
Ocular	155
Ocular Ramsden	155
Ocular Huygens.....	156
Ocular Kellner.....	156
Microscòpi compòst	156
Preparassion e anluminassion dl'ogét	159
Osservassion an camp ciàir pér trasparença	159
Osservassion d'ogét opach.....	159
Osservassion an camp èscur	160
Canucial astronòmich	160
Canucial terestr.....	161
Canucial a veïcol.....	161
Canucial a prìsma.....	162
Canucial èd Galiléo	163
Angrandiment, luminosità, overtura.....	163
Telescopi a spécc	164
Obietiv fotogràfich	165
Obietiv simétrich.....	166
Obietiv a trien-a.....	166
Obietiv derivà.....	167
Teleobietiv	167
Projetor	168
Òtica matrissial.....	169
Matris èd trasferiment dël ragg	169
Matris d'element sempi	170
Spassi veuid	170
Arfrassion an s'un pian	171
Arfrassion an 's na surfassa sférica.....	171
Arfrassion an 's na lente sutila.....	172
Arbatiment an 's nè spécc pian	172

Arbatiment an 's nè spécc sférich	172
Matris prodòt èd pì component	173
N'esempi	173
Sistema periòdich	174
Trajetòria armònica e trajetòria periòdica	175
Arsonador òtich	177

TAULA DLE FIGURE DLA TERSA PART

Figura 1 - Schematisassion èd l'euj	153
Figura 2 - Àngol èd visual an fonsion dla distansa	154
Figura 3 - Osservassion èd n'ogét	154
Figura 4 - Microscòpi sempi	154
Figura 5 - Ocular Ramsden	155
Figura 6 - Ocular Huygens	156
Figura 7 - Ocular Kellner	156
Figura 8 - Microscòpi compòst	157
Figura 9 - Schematisassion dël microscòpi	158
Figura 10 - Obietiv dovrà a imersion omogénia	158
Figura 11 - Anluminament da sota, osservassion pér trasparença	159
Figura 12 - Anluminament da dzora, osservassion d'ogét opach	160
Figura 13 - Anluminament an camp èscur	160
Figura 14 - Canucial astronòmich	161
Figura 15 - Canucial terestr a veïcol	162
Figura 16 - Canucial a prisma	162
Figura 17 - Canucial èd Galiléo	163
Figura 18 - Luminosità d'un canucial	163
Figura 19 - Formassion dl'imàgin pér nè spécc	164
Figura 20 - Telescopi tipo Newton e tipo Cassegraine	165
Figura 21 - Lastra 'd coression Schmidt	165
Figura 22 - Obietiv simétrich	166
Figura 23 - Obietiv a trien-a	166
Figura 24 - Obietiv Sonnar	167
Figura 25 - Prinsipi dël teleobietiv	167
Figura 26 - Projetor	168
Figura 27 - Ragg ant un sistema òtich	169
Figura 28 - Schema pér la matris èd trasferiment dël ragg	170
Figura 29 - Ragg ant lë spassi veuid	170
Figura 30 - Ragg an 's na surfassa sférica	171
Figura 31 - Ragg an 's nè spécc sférich	172

Figura 32 - Sistéma òtich con component an cascà	173
Figura 33 - Ragg ant un sistéma òtich.....	174
Figura 34 - Sistema òtich periòdich.	175
Figura 35 - Studi dle condission pér n'arsonador òtich.....	177

Pàgina lassà veuida apòsta

JË STRUMENT ÒTICH

An costa part i doma n'uciada ai prinsipaj strument òtich che a peulo esse studià considerand la teorìa dl'òtica geométrica ch'i l'oma vist fin-a sì. Coma sempe i androma nen trèp ant l'ancreus.

Com as forma l'imàgin ant l'euja

Da na mira òtica, l'euja a peul esse schematisà coma un dispositiv fait da na lent, ciamà "**cristalin**", C , con n'overtura ciamà "**lum**" L che a ven regolà da un diaframa dit "**íride**" D , e da n' scherm che as èsvilùpa an's na surfassa sférica ciamà "**rétina**" R .

El cristalin a l'é comandà da mûscoj che a peulo cambié soa curvadura e donca soa distansa focal. An costa manera l'euja a peul buté a feu an sla rétina d'imagin che a stago a na distansa da a-peu-pré 25 cm (distansa pijà an manera conventional), fin-a a l'anfinì. Anans a l'overtura a-ié n'autra lent ciamà "**còrnea**" K , mentre la sfera che a pòrta anans còrnea , íride e cristalin e darera la rétina a l'é pien-a 'd líquid bin trasparent. I doma n'arpresentassion schemàtica an figura 1




Figura 1 - Schematisassion èd l'euja

Sota ij 25 cm èd distansa, èd sòlit la vision a l'é pì nen sclinta, contut che l'euja a peussa esse forsà a buté a feu. Sta distansa a ven coma convention ciamà "pont davzin".

La visual a l'anfinì, e a distansa gròssa, a compòrta che 'l cristalin a sia arlamà complét, e costa a l'é na posission d'arpòs pér l'euja. Pér formé l'imàgin d'ogéti pì davzin l'euja a venta ch'a "**acòmoda**", com as dis, e 'l cristalin a ven contrat.

L'íride a régola an manera automàtica la lus ch'a intra ant l'euja, e a peul cambié 'l diàmeter dël lum da un pàira 'd milim fin-a a a-peu-pré eut milim.

El podèj arzolutiv èd l'euja a l'é motobin àut, e a riva a dëstingoe particolar sota n'àngol che 'd sòlit a ven considerà coma $30''$ èd gré. A l'é coma dì che se doi ragg ch'a parto da doi pontin luminos a rivo a l'euja formand n'àngol èd $30''$ ò 'd pì a peulo esse dëstingoù coma doi pontin separà.

An realità a l'é nen parèj sempia la costion, e a dipend nen mach da la luminosità e dal contést dl'imàgin, ma da fator neurofisiològich che a dipendo nen da le lèj dl'òtica. An quàich manera sto podèj arzolutiv a peul esse arportà a la dimension dij ricetor èd lus dla rétina.

A l'é ciàir che pì l'ogét a l'é lontan e pì l'àngol èd vision as èstrenz, mentre pì l'ogét as avzin-a e pì l'àngol èd vision a chërs, com as peul vëdde con él sempi esempi ch'i l'oma arportà an figura 2, andova st'àngol a l'é $\alpha \cong \frac{a}{d}$




Figura 2 - Àngol èd visual an fonsion dla distansa

Ma l'ejj pér vardé còse davzin-e a venta ch'a acòmoda, e sòn a dventa un problema sota ij 25 cm, (sempe coma média) com i l'oma dit prima. Jë strument òtich a servo a vëdde lòn che l'ejj da sol a riva nen a vëdde. Sì i vardoma doe categorie 'd costi strument, pér vëdde cose davzin-e e cite, pér vëdde còse lontan-e.

Microscòpi sempi

As ès-ciama parèj na sempia lent d'angrandiment. La grandëssa èd n'ogét vista da l'ejj a dipend da la grandëssa èd soa imàgin an sla rétina. A l'é ciàir, e is arferima a figura 3, che la vision pì ò manch gòssa e sclinta èd n'ogét ò particolar dl'ogét y' a dipend da l'àngol u , che a corispond a na longhëssa y' an sla rétina. Sòn a veul dì che avzinand l'ogét st'àngol a chërs e la vision a miliora. Ma a-i é un lìmit, com i l'oma vist, che i pijoma a 25 cm. Fin-a a sta mira l'ejj a acòmoda e a riva a buté a feu l'ogét ò particolar, mentre pì davzin la portà a feu a l'é pì nen bon-a e la vision, anvece che vnì pi bon-a a ven pì grama.




Figura 3 - Osservassion èd n'ogét

Se fra imàgin e ejj as buta na lent convéssa, an manera che l'imàgin a sia ant él feu dla lent, com an figura 4, l'ejj a arsèiv il ragg coma da n'imàgin a l'anfinì, e donca a l'ha nen da manca d'acomodé




Figura 4 - Microscòpi sempi

Rispét a prima, che i l'avio al pì l'àngol èd visual $u \cong \frac{y}{25}$ (dimension an centim), adéss l'àngol u' èd visual a val $u' \cong \frac{y}{f}$. Donca i podoma parlé èd n'angrandiment angolar $G_\omega = \frac{\tg u'}{\tg u} = \frac{25}{f}$ se la distansa focal f a l'é dàit an cm.

I podoma 'dcò scrive che $G_w = 0,25 \cdot D$ passand a meter e diottrìe dla lent. Dovrà an costa manera donca la lent a dà n'imàgin virtual a l'anfinì con n'angrandiment angolar che a l'é un quart dl'invers èd soa distansa focal.

As peulo nen oten-e d'angrandiment trop gròss a rason dj'aberassion che a lìmito l'usagi dla lent sempia. Na lent compòsta coa cola pér eliminé j'aberassion cromàtiche ch'i l'oma vist a përmëtt d'avej arzultà pì bon, ma i trovoma sempe un lìmit dàit da j'aberassion résidue.

Ocular

As ciama parèj na lent d'angrandiment cand sò but a l'é col èd fè vèdde l'imàgin prodòta da n'autr sistema òtich. Ant jè strument che i vèddroma st'autr sistema òtich a l'é n'obietiv.

A son stàit proponù vaire tipo d'ocular. Fra ij prim ant l'ordin èd temp, i l'oma l'ocular èd Ramsden e l'ocular èd Huygens, che i vardoma sì dapréss. A-i son peui èd tipo d'ocular un pòch pì complicà, pér diminuì, pér lòn ch'as peul, j'aberassion. Tuti sti ocular a arduvo j'aberassion rispèt a l'usagi èd na lent sempia. I arportoma mach ij prim tre ocular, che a dàn èl prinsìpi, arcordand che a-i son vaire ocular sempe pì modern e sempe pì bon.

Ocular Ramsden

A l'é fàit da doe lent pian-convésse con l'istéssa distansa focal, vis-a-dì che $f_1 = f_2$. Fra ste doe lent a-i é nè spassi a che 'd sòlit a l'é $2/3$ dla distansa focal. An efét ij nùmer dla proporsion fra feu f_1 , distansa a e feu f_2 a son 3:2:3.

Sò usagi normal a l'é col èd fè vèdde an manera direta a l'osservator n'imàgin real prodòta da n'obietiv. A furniss n'imàgin virtual a l'anfinì, dal moment che ij ragg relativ a un pont a rivo paraléj a l'euj.

Soa realisassion a l'é mostrà an figura 5. St'ocular a peul fonsioné da lent d'angrandiment pér n'ogéti real e a ven ciamà "**ocular positiv**".




Figura 5 - Ocular Ramsden

Ocular Huygens

St'ocular a l'é sempe fait da doe lent pian-convesse, ma con carateristiche differente. Ij doi feu f_1 e f_2 e la distansa a a stan ant la proporsion 3: 2: 1 e dle vire 'dcò 4:3:2.

La prima lent, an efét, a interceta ij ragg che a rivo dal sistema anans (cbietiv) e che a andrò a formé l'imàgin real I , e a-j viro a formé l'imàgin real I' . As peul donca dì che I a l'é l'ogét virtual dl'imàgin I' .

A sta mira la sonda lent a serv da lent d'angrandiment pér l'màgin I' , e a forma n'imàgin virtual a l'anfinì, com as peul vèdde an figura 6.




Figura 6 - Ocular Huygens

Ocular Kellner

A l'é na derivassion direta da l'ocular èd Ramsden, con la differensa che la sonda lent a l'é pì nen na lent sempia ma na cobia acromàtica (veder crown - veder flint), che a serv a eliminé l'aberassion cromàtica resida. Pér ël rest ël prinsipi 'd fonsionament a l'é l'istéss. I doma n'arpresentassion an figura 7.




Figura 7 - Ocular Kellner

Microscòpi compòst

Ël but dë sto strument a l'é l'istéss èd col dla lent sempia, ma a serv a oten-e d'angrandiment motobin pì àut. Sì is arferima a un microscòpi clàssich a vision direta, che a l'é compòst da n'obietiv e n'ocular, e che a produv n'imàgin virtual a l'anfinì dl'ogét an osservassion.

El prinsipi 'd fonsionament a l'é che l'obietiv, che i podoma schematisé con na prima lent, a forma n'imàgin real dl'ogét an sël pian focal dla sonda lent, che a schematisa l'ocular, e che a forma n'imàgin virtual a l'anfinì. Is arferima a figura 8.




Figura 8 - Microscòpi compòst

L'ogét da esaminé as treuva pòch prima dël prim feu dla prima lent (obietiv), an posission da formé n'imàgin real an sël pian focal dla sonda lent. An costa manera l'osservator a peul vèdde n'imàgin virtual a l'anfinì.

Obietiv e ocular a venta ch'a sio 'd sistema òtich con na motobin bon-a compensassion dj'aberassion che, a l'é ciàir, pì l'agrandiment a l'é àut e pì a dèsturbo l'osservassion.

Pèr l'agrandiment dël microscòpi as considera sempe 'l rapòrt fra la tangent èd l'àngol visual u' èd na dimension trasversal y' vista travers èl microscòpi e l'àngol visual u dl'ogét y corispondent vist a euj nù a 25 cm èd distansa.

Se donca y a l'é la dimension trasversal dl'ogét, che sì i doma an milim, i l'avroma che :

$$\tan u = \frac{y}{250} \quad ; \quad \tan u' = \frac{y'}{f_2}$$

andova f_2 , sempe an milim, a l'é la distansa focal dla lent che a modéla l'ocular. Se i scrivoma donca l'agrandiment angolar total G_ω dël microscòpi i otnoma:

$$G_\omega = \frac{\tan u'}{\tan u} = \frac{\frac{y'}{f_2}}{\frac{y}{250}} = \frac{y'}{y} \cdot \frac{250}{f_2} \quad \text{e i l'oma vist che sòn a corispond a } G_\omega = G_t \cdot G_{\omega_0}$$

andova G_t a l'é l'agrandiment trasversal dl'obietiv e G_{ω_0} a l'é l'agrandiment angolar dl'ocular.

An coste condission, vis-a-dì con l'imàgin real dl'ogét ant èl feu dl'ocular, e donca l'imàgin virtual a l'anfinì, as definiss la "potensa intrìnseca" dël mictoscòpi. An coste condission i podoma, arferendse a figura 9, scrive l'agrandiment dla lent obietiv coma: $G_{ob} = \frac{A'B'}{AB}$, che dai triàngoj sìmij OMF'_1 e F'_1A'B' a arzulta esse 'dcò : $G_{ob} = \frac{F'_1F_2}{f_1}$ (B' e F_2 a coincido).




Figura 9 - Schematisassion dël microscòpi

La potensa dl'ocular P_{oc} a val soa convergensa, e donca $P_{oc} = \frac{1}{f_2}$. I definima potensa intrìnseca dël microscòpi $P_i = G_{ob} \cdot P_{oc} = \frac{F'_1 F_2}{f_1 f_2}$ andova f_1 e f_2 a son, ant l'ordin, le longhèsse focaj dl'obietiv e dl'ocular. Dal moment che 'd sòlit ste distanze focaj a son cite rispét a la distansa d dle doe lent (doi sistema) as peul aprossimé l'espression sì dzora con $P_i = \frac{d}{f_1 f_2}$. Pér fé n'esempi, i pijoma $f_1 = 2\text{ mm}$; $f_2 = 2\text{ cm}$; $d = 16\text{ cm}$ i l'oma che la potensa intrìnseca a val 4000 diotriè e l'angrandiment, che a l'é un quart dla potensa, com i l'oma vist, a val 1000 X.

Èd sòlit obietiv e ocular a son soliudaj, e lë strument a ven butà a feu spostand èl tut rispét a l'ogét an osservassion, che as treuva a pòchi milim da la prima lent èd l'obietiv (lent frontal). Èl sistema pér buté a feu a l'é motobin precis e motobin demoltiplicà pérchè jè spostament necessari a peulo esse 'd pòchi micron.

Sempe 'd sòlit, un microscòpi a l'ha na torëtta con different obietiv pér angrandiment different a seconda 'd lòn ch'a serv. An costi obietiv, an particolar pér col d'angrandiment èl pì gròss, la lent frontal a l'é sovent fàita a mesa sféra, pér podèj avzinesse a le condission d'aplanatissità ch'i l'oma vist ant la sonda part.

La distansa focal a l'é motobin cita (a peul rivè a 2 mm) e l'ogét an osservassion as treuva a na distansa dë st'ordin. An quàich cas, antlora, as peul buté na gossa 'd sostansa lìquida, e viscosa a la giusta mira, bin transparenta e con n'indes d'arfrassion istéss a col dla lent, che a òcupa lë spassi fra ogét e lent. An coste condission as realisa al complét la situassion con l'ogét andrinta a la lent sférica ch'i l'oma vist. Coste a son le condission d'obietiv a "**imersion omogénia**". Èd sòlit l'ogét a l'é quatà da na lastrin-a bin sutìla 'd veder dl'istéss tipo dla lent. Sòn a l'é arpresentà an figura 10.




Figura 10 - Obietiv dovrà a imersion omogénia

L'òvertura dël còno 'd ragg luminos che dai pont èd l'ogét a van a lë strument a l'é pì àuta se l'obietiv a l'é dovrà a imersion.

Pér j'angrandiment pì bass l'obietiv a peul esse fait da un paira 'd cobie acromàtiche 'd lent, mentre che pér fòrt angradiemt j'obietiv a dvento pì complicà.

Preparassion e anluminassion dl'ogét

Con distanse focaj com i l'oma vist, la profondità 'd feu a l'é motobin cita, e l'osservassion a l'é limità a un seul èd pòchi micron. L'ogét da osservé, antlora, a ven preparà coma un seul motobin util e posà su un vedrin èd supòrt, peui a ven quatà da un vedrin èd protession spess pòchi désim èd milim. Costa a l'é la preparassion la pì comun-a, ma sòn a dipend èdcò da la manera d'osservassion. As supon che l'ogét a sia nen luminos e che donca a venta ch'a sia anluminà.

Osservassion an camp ciàir pér trasparensa

An sto cas, èl pì comun, l'ogét, preparà su un vedrin com i l'oma vist sì dzora, a l'é osservà an trasparensa, e a arsèiv la lus da la part opòsta a l'obietiv. Figura 11 a mostra costa situassion. La lus a intra ant èl microscòpi e a mostra un camp ciàir che a conten l'ogét.




Figura 11 - Anluminament da sota, osservassion pér trasparensa

Osservassion d'ogét opach

Cand l'ogét a lassa nen passee la lus, ò a na lassa nen passé a basta, a peul vnì anluminà da dzora, da l'obietiv midem. Sòn a ciama na cita complicassion dël microscòpi, com a l'é ilustrà sì sota an figura 12.




Figura 12 - Anluminament da dzora, osservassion d'ogét opach

La sors èd lus a manda ij ragg, travers un prim condensator, a na lastrin-a 'd véder che as treuva fra ocular e obietiv, e che a l'é anclinà a 45° , com an figura. Part èd la lus a ven arbatùa vers l'obietiv, che a fà da scond condensator e a anlùmina l'ogét.

L'imàgin, a soa vira, a perd un pòch èd luminosità, pérchè ij ragg emëttù dai pont dl'ogét e che a intro ant ël microscòpi, a ven-o 'dcò lor an part arbatù fòra da la lastrin-a.

Osservassion an camp èscur

As trata 'd mandé la lus d'anluminament an manera che costa a intra nen an manera diretta ant ël microscòpi, andova anvece a intra mach la lus difusa ò difrata da l'ogét. An pràtica, la lus a ven mandà an sij fianch, arbatùa da surfasse conveniente, con vàire técniche dont la figura 13 a na ilustra un-a.




Figura 13 - Anluminament an camp èscur

Canucial astronòmich

Sto strument, fàit pér osservassion d'ogét motobin lontan, a l'é sempe fàit da n'obietiv, che a l'ha 'l but èd dé n'imàgin real dl'ogét, e n'ocular che a produv n'imàgin virtual a l'anfinì dl'imàgin dàita da l'obietiv. As trata donca d'un sistema telescopich, andova lè scond pian focal dl'obietiv a coincid con ël prim pian focal dl'ocular.

Rispét al microscòpi, che a serv a osservé còse motobin cite e motobin davzin, sto canucial a serv a osservé cose motobin gròsse e motobin lontan-e. Mentre un pont dl'ogét osservà al

microscòpi a manda ij ragg ant un còno con na dàita overtura, ij ragg che a rivo al canucial astronòmich da un pont èd l'ogéti a son an pràctica paraléj.

La figura 14 a mostra lë schema 'd base dë sto canucial, andova obietiv e ocular a son arpresentà da doe lent.




Figura 14 - Canucial astronòmich

La longhëssa dël canucial a l'é, an pràctica, l'adission dle longhesse focaj dl'obietiv e dl'ocular. La figura a ven vëddùa anvertìa (àut con bass e drita con snistra), ma sòn a l'é nen un problema pér un canucial astronòmich.

L'angrandiment angolar G_o a l'é sempe dàit da $G_o = \frac{\tg u'}{\tg u}$ e se i vardoma an figura ij

doi triàngoj *abc* e *def* (i notoma che *c* a l'é la posission dlë scond feu dla prima lent e dël prim feu dla sonda, mentre *f* a l'é la posission dlë scond feu dla sonda lent), i podoma scrive :

$$\tg u = \frac{-y'}{f_1} ; \quad \tg u' = \frac{y'}{f_2} \quad \text{e donca} \quad G_o = -\frac{f_1}{f_2}$$

andova 'l segn "−" a ìndica che l'imàgin a l'é anvertìa.

L'obietiv a l'avrà donca na longhëssa focal bin àuta e l'ocular a l-l'avrà bin curta. A venta però ten-e cont dle aberassion, che a deuvo esse coregiùe, e dla luminosità, che a venta nen ch'a sia trop bassa. I l'oma già vist che as trata 'd trové 'l compromess pì bon.

Canucial terestr

Mentre pér èl canucial astronòmich a-j na 'nfà nen che l'imàgin a sia anvertìa, pér l'osservassion d'ogéti lontan an sla tera costa a l'é n'inconvenient nen acetàbil, dal moment che j'ogéti a venta ch'a sio vist pròpi com a son e ant la giusta posission. As trata donca d'ardrissé l'imàgin dàita da un canucial coma col èd prima.

Canucial a veìcol

Sòn a peul esse fait giontand na lent fra obietiv e ocular, ciamà "veìcol", con èl but d'ardrissé l'imàgin real furnìa da l'obietiv fasend na neuva imàgin real arvoltà che a serva da ogéti a l'ocular. Në schema dë sto tipo a l'é arportà an figura 15.




Figura 15 - Canucial terestra veìcol

La lent veìcol, pér formé n'imàgin real anvertìa rispét a l'imàgin che a-j fà da ogéti e che as forma an slë scond pian focal dl'obietiv, a l'ha da manca che sò prim feu a casca fra st'imàgin e la lent midema. An particolar, se as veul n'imàgin ardrissà gròssa istess a cola formà da l'obietiv, a venta che 'l prim feu dèl veìcol a staga a metà distansa fra imàgin e lent. L'imàgin ardrissà, an costa situassion, as forma a na distansa dal ve'col che a sarà 'l dobi dla distansa focal dèl veìcol midem. Èl canucial, donca, as èslonga èd quat vire la distansa focal dla lent veìcol.

Canucial a prisma

Sta solussion pér ardrissé l'imàgin a l'é dovrà ant ij binòcoj (che a son nen d'àutr che doi canuciaj socià). L'imàgin a ven ardrissà pér arbatiment total sle surfasse 'd doi prisma butà fra l'obietiv e l'ocular an manera convenienta.

Oltra a sta fonsion d'ardrissament èl vantagi a l'é 'dcò col dë slonghè 'l camin òtich fra obietiv e ocular, e donca përmëtte 'd dovré distanze focaj pì gròsse pér l'obietiv, otnend parèj n'angrandiment pì àut sensa ocupé trop èspassi an longhëssa-

An figura 16 i mostroma né schema dë sta realisassion, che a podrìa esse la metà d'un bvinòcol. Pér cairëssa i l'oma disegnà ij doi prisma distacà, ma 'd sàlit a son a contat fra 'd lor.




Figura 16 - Canucial a prisma

Canucial ed Galiléo

Cost a l'é 'l prim canucial dovrà. A l'é fàit da n'obietiv che i modeloma sempe con na lent convessa, ma che a podrìa esse fòit da na cobia acromàtica, e da n'ocular fàit da na lent concava, che a dà l'imagin virtual che as vèdd. I arportoma na schematisassion an figura 17.




Figura 17 - Canucial ed Galiléo

La lent obietiv a tira a formé n'imàgin real I dòp ël feu F'_1 (opura, al lìmit, an sël pian focal), ma prima dëf feu ij ragg a son anterçetà da la lent concava, che a-j fà diverge, fasend converge sò prolongament ant l'imàgin virtual I' . Costa a l'é la solussion dovrà dai bvinòcoj da teatro.

Angrandiment, luminosità, apertura

Is arferima a figura 18 pér fé 'ncora quàich considerassion relativa ai sistema ottici ch'i l'oma vist fin-a sì. Ant ël sistema schematisà an figura i l'oma che 'l bòrd dl'obietiv a l'é 'l lum d'intrada 'd nòstr sistema. L'ocular a forma n'imàgin dë sto bòrd, e cost al'é 'l lum ed seurtia dël sistema. La lus ch'a intra da l'obietiv a seurt da costa imàgin.

I l'oma che D a l'é 'l diàmeter dl'obietiv e D' èd diàmeter èd soa imàgin an sl'ocular. Pér sfruté tutta la lus che l'ogét a manda al sistema, a venta che costa a intra ant l'euj dl'osservator, dont l'iride a l'avrà un diàmeter D' . La lus che a seurt da l'ocular a l'avrà 'l diàmeter mìnimo D' a na dàita mira, andova a và l'eui dl'osservator. An figura 'l diameter D' a l'é schematisà coma costant.




Figura 18 - Luminosità d'un canucial

An figura, se x a l'é la distansa fra l'obietiv e 'l prim feu dl'ocular, i l'oma che $x = f_1$. I podoma dì che l'angrandiment G_t dl'ocular pér ël pian frontal che a conten l'obietiv a sarà

$$G_t = \frac{D'}{D} \quad \text{ma 'dcò} \quad G_t = -\frac{f_2}{f_1}$$

ma i l'oma vist prima che $G_\omega = -\frac{f_1}{f_2}$ e donca $G\omega = \frac{D}{D'}$.

L'angrandiment angolar a l'é donca dàit dal rapòrt fra 'l diàmeter dl'obietiv e l'diàmeter èd soa imàgin an sl'ocular, che a l'é fàcil da vèdde e misuré, e as esprim èd sòlit an "**diàmeter**".

La luminosità d'un canucial a dipend da la quantità d'lus che a ven portà al lum èd seurtìa, e donca a dipend dal diàmeter dl'obietiv. A parità d'angrandiment, pì l'obietiv a l'é gròss e pì l'imàgin a l'é luminosa.

As definiss coma "**overtura dl'obietiv**" indicà con 2α , èl rapòrt $2\alpha = \frac{f_1}{D}$, che a l'é na misura inversa 'd luminosità. Èl diameter dl'obietiv a peul nen esse trop gròss pér nen avèj aberassion, e donca nen sempe al peul rivé a avèj la luminosità a basta, an particolar pér fotografie, e donca as trata 'd passe a obietiv a arbatiment (ò rifletor). La luminosità, antlora a sarà tant pì àuta cant pì cit a l'é 'l rapòrt ch'i l'oma vist. I savoma tuti che n'overtura èd 5,6 a l'é pì "larga" che n'overtura 8 dl'obietiv.

Telescòpi a spécc

Parèj com un diòttr arfrangent, èdcò në spécc conch sférich ò parabòlich a l'é bon a formé n'imàgin real èd n'ogét, che a soa vira a peussa fé da ogét a n'ocular, che a na produva n'imàgin virtual. Sòn a l'é mostrà an figura 19.




Figura 19 - Formassion dl'imàgin pér në spécc

JË spécc sférich a peulo nen avèj d'overture trop gròsse, al moment che a presento aberassion dë sferissità e 'd còma pitòst evidente. Con jë spécc parabòlich, anvece as peul fésse motobin èd pì, dal moment che coste aberassion a son pì continùe.

Pér l'osservassion as trata donca 'd porté l'imàgin real prodòta da lë spécc ant èl prim feu èd n'ocular, che a sia fòra dal pèrcors dij ragg che a rivo da l'ogét osservà. A-i son doi tipo pì amportant èd solussion, che a son ilustrà an figura 20.




Figura 20 - Telescòpi tipo Newton e tipo Cassegraine

Pér dovré spécc sférich con ouvertura gròssa, as peul adoté la lastra 'd coression pér j'aberassion dë sferissità e còma che i l'oma dit ch'a son gròsse. Sta lastra a l'é dit dë Schmidt, dal nòm èd chi a l'ha proponùla. An figura 21 a l'é mostrà an manera schemàtica com a fonsion-a.




Figura 21 - Lastra 'd coression Schmidt

Ij ragg indicà an bleu a sarìo coj che as avrìo sensa coression, e che a convergio an pont different èd l'ass an fonsion èd soa distansa da l'ass òtich midem. La coression dàita da la lastra, con sàgoma convenienta, a fà an manera che ij ragg a convergio tuti ant l'istéss pont, an manera andipendenta da soa distansa da l'ass òtich. Sòn a l'è arpresentà dai ragg disegnà an ross, che a van pì ò manch tuti a converge ant èl pont indicà con *b*. Èl disegn, com a l'è ciàir, a esàgera motobin j'aberassion dlë spécc. An costa manera però as riva a gròsse luminosità sensa aberassion significante.

Obietiv fotogràfich

Èl but dl'obietiv fotogràfich a l'è col èd formé n'imàgin real an 's nè scherm con dimension ant l'òordin dij centim linear, che a peul esse na pelcola sensìbil opura un trasdutor òtich-eletrich pér la registrassion eletrònica dl'imàgin. Da na mira òtica lòn ch'a anteressa a l'è che

l'imàgin a sia a feu, corispondent coma forme e color a la realità, e con na luminosità a basta da podej registré tuta l'anformassion ch'a serv, contut che l'imàgin an slë scherm a peussa duré mach na cita frassion èd second.

A-i son vâire grandësse che a carateriso n'obietiv fotogràfich, dont cole ch'i consideroma a son: 1) - l'àngol èd camp 2γ che a indica l'àngol che l'obietiv a vëdd l'ogét an manera sclinta. 2) - l'overtura f / h , ancora indicà coma àngol 2α , e che a dà l'invers dla luminosità dl'obietiv. 3) - distansa focal. La distansa focal a l'é cola ch'i l'oma defini pér ij sistema òtich e a l'é la distansa fra lë scond pont prinsipal (che a coincid con lë scond pont nodal) e lë scond feu dl'obietiv.

Sensa che a-i sia na teorìa che a sodisfa pér calcolé n'obietiv, costi a son evolùsse con intuission l'un-a dòp l'àutra, e a son rivà a doi schema 'd base (tnisend sempe cont che pér n'obietiv sensa pretèise a basta giusta na lent convergente), che a rivo a eliminé l'astigmatism an sij bòrd, e che donca a son ciamà "*anastigmàtich*".

Obietiv simétrich

A l'è fait da na cobia èd trien-e 'd lent che a deuvro tre véder different. Na trien-a a l'è istessa a l'àutra e an posission simétrica. La figura 22 a mostra st'obietiv.




Figura 22 - Obietiv simétrich

N'obietiv dë sto tipo a l'ha n'overtura relativa che a sùpera nen $1/6$ con distansa focal èd pì ò manch 150 mm e camp èd 35° . La coression dj'aberassion a l'é motobin bon-a.

Obietiv a trien-a

A l'è fàit da tre lent, pensà da Taylor ant èl 1895. Èdcò coste a son èd tre véder different. I lo mostroma an figura 23.




Figura 23 - Obietiv a trien-a

Con st'obietiv a-i é na bon-a coression dj'aberassion a na distansa focal èd 140 mm , con n'overtura èd $1/6$ e n'àngol èd camp èd 50° .

Obiettivo derivato

Da costi schema 'd base pitòst vèj a son derivato i differenti obiettivi moderni, e fra costi coj ch'a son ciamati "obiettivi universali". I arportoma giusta, an figura 24, lè schema dell'obiettivo Sonnar del tipo.




Figura 24 - Obiettivo Sonnar

Teleobiettivo

L'ampiezza 'd n'imagine èd n'oggetto lontano a dipend da la distanza focali dell'obiettivo. Dona pér avèj n'imagine grossa a basta èd n'oggetto lontano a vento dovrà d'obiettivo con la bin grossa distanza focali, e son a portata d'espositivo motobin angombrant. Pér nen dovrà dovrà d'espositivo troppo grosso, a son staiti pensati i teleobiettivi, che as baso an's na na differente concessione. Is arferimè a figura 25.




Figura 25 - Princípio del teleobiettivo

I suponiamo un raggio parallelo a l'ass, coma col ciamato *1* an figura, che a intra an nostr sistema. An figura con *L₁* i l'oma indicà l'obiettivo normal che a l'avrà na distanza focal *f'*. Donca 'l raggio d'entrada *1* a diventa 'l raggio *2* che a va vers el feo *F'_1* èd nostr obiettivo *L₁*. Prima d'rivé a sto feo 'l raggio *2* a crosia la lent *L₂* che a l'é divergente (lent negativa), che a provoca la deviassion che a fa continué 'l raggio coma raggio *3*, second la notassion èd figura. Sto raggio a crosia l'ass ottico ant el pont *F'*, che donca a l'é lè scond feo èd nostr sistema.

Adesso, se i prolongamo a l'andarera 'l raggio *3* (coma la linea rossa tracciata an figura), i troviamo un pont *P'* andova 'l prolongamento d'el raggio a crosia 'l raggio *1* d'entrada. El pian *π'*, che a conten el pont *P'*, as compòrta coma scond pian prinsipal e a l'é, an efét, lè scond pian prinsipal d'el sistema, che donca a l'ha *F'* coma scond feo. La distanza focal *f* che an anteressa, com as peul vedde, a l'é motobin più grossa dla distanza *f'*, e l' pian *π'*, da dova la distanza a l'é misurà, a casca diritura fòra, anans al teleobiettivo.

Projetor

I parloma 'd projetor èd figure su supòrt trasparent (coma pér le diapositive). Lë schema dël projetor a l'è airportà an figura 26




Figura 26 - Projeter

Cola an figura a l'è na sempia schematisassion che a considera l'obietiv coma fàit da na sola lent. I stoma nen a gionté d'àutr e ant la part ch'a-i ven i trateroma ampréssa d'òtica fisica pér giustifiché 'd fenòmeno coma coj dla diffrazion.

ÒTICA MATRISSIAL

A sta mira i voroma dé n'arpresentassion, che a peul esse bin còmoda, pér un ragg che a traversa un sistema òtich. St'arpresentassion a supon che ij ragg a viagio su d'un pian, e donca as arferìssio 'dcò al cas d'un sistema con simetria radial antorna a l'ass òtich, supòst che ij ragg a stago su pian meridian (com èd sòlit a sucéd). Is mantnìma peui ant l'aprossimassion èd ragg parassiaj, andova as peul supon-e che, se φ a l'é l'àngol fra ragg e ass, st'àngol a l'é sempe cit a basta da podèj supon-e che $\sin \varphi \approx \varphi$.

El vantagi èd costa arpresentassion a l'é che la matris èd trasferiment dël ragg d'un sistema fait da pì element an cascada a lé 'l prodòt dle matris dij sìngoj element.

Matris èd trasferiment dël ragg

I suponoma un sistema òtich qualunque, formà da vaire surfasse arfrangente ò arbatente, dël tipo 'd coj ch'i l'oma dëscrivù prima, an 's n'ass òtich che i ciama z . I consideroma un ragg che a viagia an s'un pian, che i disoma y,z . Sto ragg, an qualunque posission z drinta al sistema, a l'é caraterisà al complèt da la distansa y da l'ass e da l'angol φ che 'l ragg a fà con l'ass. Sto fait a l'é mostrà an figura 27.




Figura 27 - Ragg ant un sistema òtich

Se i consideroma 'l sistema òtich ant èl sò ansema, i l'avroma na coordinà z_1 d'intrada, che a corispond al pian xy d'intrada, e na coordinà z_2 èd seurtìa, che a corispond al pian xy èd seurtìa. El sistema a l'é caraterisà al complèt da sò efét an s'un ragg che as treuva an sël pian yz e che a intra dal pian d'intrada an z_1 a na posission qualunque y_1 e con n'àngol qualunque φ_1 . El ragg a seurtirà dal pian èd seurtìa an z_2 a na posission y_2 e con n'àngol φ_2 , che a son fonsion èd y_1 e φ_1 , e dl'assion dël sistema òtich.

Ant un sistema con ragg che a peulo esse considerà parassiaj, andova $\sin \varphi \approx \varphi$, fra intrada e seurtìa a-i é na relassion linear che a peul esse scrivùa, an general coma:

$$y_2 = A y_1 + B \varphi_1 \quad ; \quad \varphi_2 = C y_1 + D \varphi_1$$

andova A, B, C, D a son costant reaj, che a caraterìso 'l comportament dël sistema òtich. Le doe equassion sì dzora a peulo esse scrivùe an manera pì satìa coma:

$$\begin{bmatrix} y_2 \\ \varphi_2 \end{bmatrix} = \begin{bmatrix} A & B \\ C & D \end{bmatrix} \begin{bmatrix} y_1 \\ \varphi_1 \end{bmatrix}$$

La matris con j'element A, B, C, D a l'é dita "matris dëd trasferiment dël ragg". I arportoma an figura 28 la schematisassion dëd lòn ch'i l'oma dit.




Figura 28 - Schema per la matris d'trasferimento del raggio

Matris d'element sempi

I vardoma adéss com a l'é fàita la matris dij different element sempi, pér peui vardé lòn ch'a suced a buté doi ò pì che doi element l'un daré 'd l'autr.

Spassi veuid

Ant lë spassi veuid ij raggia viagio second lìnie drite, e donca a manten-o l'àngol an sl'ass òtich, mentre la distansa da l'ass òtich a càmbia an manera linear con él përcors fait. Is arferima a figura 29.




Figura 29 - Raggio ant lë spassi veuid

Dal moment che i consideroma ragg parassiaj, él fator èd proporsionalità fra përcors e variassion dla y a l'é giusta φ . Se la distansa fra la surfassa d'entrada e cola 'd seurtìa a l'é l , j'equassion scrite prima a dvento $y_2 = y_1 + l \varphi_1$; $\varphi_2 = \varphi_1$

La matris èd trasferiment dël ragg a sara donca dàita da $\begin{bmatrix} 1 & l \\ 0 & 1 \end{bmatrix}$

Arfrassion an s'un pian

I suponoma un pian èd separassion fra doi mojen con different indes d'arfrassion n_1 e n_2 . An sto cas le lèj dë Snell a diso che fra 'l ragg che a riva sla surfassa da na part e col ch'a seurt da l'àutra a val la relassion $n_1 \sin \varphi_1 = n_2 \sin \varphi_2$, ma dàite nòstre ipòtesi, noi i consideroma che a sia $n_1 \varphi_1 = n_2 \varphi_2$. A l'é peui ciàir che la posission y a cambia nen, dal moment che le doe surfasse d'entrada e seurtìa a coincido. Donca i l'oma 'dcò $y_2 = y_1$.

I l'oma giusta da consideré che $\varphi_2 = \frac{n_1}{n_2} \varphi_1$, e sensa a scrive torna j'equassion i disoma sùbit

che la matris èd trasferiment travers la surfassa a val $\begin{bmatrix} 1 & 0 \\ 0 & \frac{n_1}{n_2} \end{bmatrix}$

Arfrassion an 's na surfassa sférica

I suponoma d'esce ant j'istesse condission èd prima, ma adéss la surfassa a l'é pì nen pian-a ma a l'é sférica. Pér sto cas is arferima a figura 30.




Figura 30 - Ragg an 's na surfassa sférica

L'àngol d'incidensa a l'é l'angol dël ragg an sl'ass, pì l'àngol formà dal ragg dla surfassa ant él pont d'incidensa. Tuti sti àngoj a son considerà cit. I l'oma 'dcò che $y_2 = y_1$.

Con le convension stabilìe pér :el segn èd R (ragg dla sféra) as treuva, con la lèj dë Snell, che $\varphi_2 = -\frac{n_2 - n_1}{n_2 R} y_1 + \frac{n_1}{n_2} \varphi_1$. La matris èd trasferiment a dventa $\begin{bmatrix} 1 & 0 \\ -\frac{n_2 - n_1}{n_2 R} & \frac{n_1}{n_2} \end{bmatrix}$.

Arfrassion an 's na lente sutilà

I l'oma vist che na lente sutilà a fà converge ij ragg paraléj a l'ass òtich ant èl feu, che as treuva a distansa f dal pian dla lente midema. Èl ragg che a riva al pont y con àngol $\varphi_1 = 0$, dal pont y a và al feu, ant j'ipòtesi ch'i l'oma fàit, a forma con l'ass òtich l'àngol $\varphi_2 = -\frac{y}{f}$. I l'oma 'dcò sempe che $y_2 = y_1$. I arcordoma che f a l'é positiv pér lente convesse e negativ pér lente angavà.

La matris èd trasferiment dij ragg a sarà, an sto cas $\begin{bmatrix} 1 & 0 \\ -\frac{1}{f} & 1 \end{bmatrix}$

Arbatiment an 's në spécc pian

An sto cas i consideroma la convention che 'l vers dl'ass òtich z a l'é sempe col dla propagassion dël ragg, e donca su në spécc i l'avroma z orientà vers lë spécc pér èl ragg incident, e peui orientà da lë spécc andarerà pér èl ragg arbatù. L'ass òtich a càmbia vers, ma nen diression. Con costa convention, e con èl fàit ch'i l'oma sempe $y_2 = y_1$, An pràtica a càmbia gnente, e la matris èd trasferiment a l'é giusta $\begin{bmatrix} 1 & 0 \\ 0 & 1 \end{bmatrix}$.

Arbatiment an 's në spécc sférich

I consideroma èl disegn an figura 31, andova i l'oma arpresentà l'arbetiment d'un ragg an 's në spécc angavà, e donca, pér convention, con un ragg R negativ. A val sempe l'ipòtesi dl'ass z orientà sempe ant èl vers èd propagassion dël ragg.




Figura 31 - Ragg an 's në spécc sférich

I podoma 'dcò ambelessì consideré che un ragg che a riva paralél a l'ass òtich a ven arbatù vers èl feu, che as treuva a metà strà fra 'l senter dla sféra elé spécc, an sl'ass òtich a distansa da lë spécc $f = -\frac{R}{2}$. La situassion a l'é donca torna cola 'd prima (lente sutilà), e la matris èd trasferiment

a peul esse scrivùa coma $\begin{bmatrix} 1 & 0 \\ -\frac{1}{f} & 1 \end{bmatrix} = \begin{bmatrix} 1 & 0 \\ \frac{2}{R} & 1 \end{bmatrix}$.

Matris prodòt èd pì component

I l'oma dit an prinsipi che un sistema òtich a l'é arpresentàbil con na matris èd trasferiment che a l'é 'l prodòt dle matris che a carateriso ij different component. Is arferima a figura 32.




Figura 32 - Sistéma òtich con component an cascà

A venta noté che 'l prodòt èd matris a l'é, 'd sòlit, nen comutativ. Al sistema òtich, l'intrada a l'é aplicà a la prima matris a snistra, e nòstra metodologìa a va bin se le matris indicà an figura a ven-o moltiplicà a parte da l'última. Se M a l'é la matris total dèl sistema òtich, a venta donca fé l'operassion:

$$M = M_N \cdot M_{N-1} \cdot \dots \cdot M_2 \cdot M_1$$

N'esempi

I suponoma d'avèj doe lente sutile dont la prima a l'é a distansa d_1 da nòstr pian d'intrada, e a l'ha distansa focal f_1 , la sonda a l'ha distansa focal f_2 e a l'é a distansa d_2 da la prima, e nòstr pian èd seurtia a l'é a distansa d_3 da la sonda. I l'oma parèj sinch element, che ant l'ordin a son èl tràit d_1 , la lente 1, èl tràit d_2 , la lente 2, èl tràit d_3 . I suponoma 'd dé 'd valor numérich a coste grandësse e 'd fé ij cont, che peui i controloma con èl metod gràfich. Antlora i butoma:

$$d_1 = d_2 = d_3 = 10 \text{ cm} ; f_1 = f_2 = 20 \text{ cm}$$

La matris M_5 a val $\begin{bmatrix} 1 & 10 \\ 0 & 1 \end{bmatrix}$. La matris M_4 a val $\begin{bmatrix} 1 & 0 \\ -0,05 & 1 \end{bmatrix}$. La matris M_3 a val $\begin{bmatrix} 1 & 10 \\ 0 & 1 \end{bmatrix}$.

La matris M_2 a val $\begin{bmatrix} 1 & 0 \\ -0,05 & 1 \end{bmatrix}$. La matris M_1 a val $\begin{bmatrix} 1 & 10 \\ 0 & 1 \end{bmatrix}$.

El prodòt $M_5 \cdot M_4$ a val $\begin{bmatrix} 0,5 & 10 \\ -0,05 & 1 \end{bmatrix}$, e costa, moltiplicà pér M_3 a val $\begin{bmatrix} 0,5 & 15 \\ -0,05 & 0,5 \end{bmatrix}$

El prodòt $M_5 \cdot M_4 \cdot M_3$, moltiplicà pér M_2 a val $\begin{bmatrix} -0,25 & 15 \\ -0,075 & 0,5 \end{bmatrix}$.


Costa matris, moltiplicà pér M_1 an dà :

$$M = M_5 \cdot M_4 \cdot M_3 \cdot M_2 \cdot M_1 = \begin{bmatrix} -0,25 & 12,5 \\ -0,075 & -0,25 \end{bmatrix}$$

e a sta matris a corispondono le doe equassion $y_2 = -0,25 y_1 + 12,5 \varphi_1$; $\varphi_2 = -0,075 y_1 - 0,25 \varphi_1$

A sta mira i l'oma la matris èd trasferiment total e i provoma a buté un ragg d'intrada caraterisà da $y_1 = 2 \text{ cm}$ e $\varphi_1 = 0$. An seurtìa i l'avroma $y_2 = -0,5 \text{ [cm]}$; $\varphi_2 = -0,15 \text{ [rad]}$.

An figura 33 i arportoma sto sistéma òtich e i provoma, con l'òtica geométrica, a mandé sto ragg, e fé quàich considerassion.



$$M = M_5 \cdot M_4 \cdot M_3 \cdot M_2 \cdot M_1 = \begin{bmatrix} -0,25 & 12,5 \\ -0,075 & -0,25 \end{bmatrix}$$

Figura 33 - Ragg ant un sistéma òtich

Se i suponoma 'd gavé la sonda lente, i l'oma un ragg paralél a l'ass òtich, che a la distansa f_1 dòp pa lente a dovrà esse ant él feu (an sl'ass òtich). Le matris as arduvo a 3, relative a la distansa d_1 da 10 cm , la lente 1 e la distansa d_2 da 20 cm . Donca i l'oma:

La matris M_3 a val $\begin{bmatrix} 1 & 20 \\ 0 & 1 \end{bmatrix}$. La matris M_2 a val $\begin{bmatrix} 1 & 0 \\ -0,05 & 1 \end{bmatrix}$. La matris M_1 a val $\begin{bmatrix} 1 & 10 \\ 0 & 1 \end{bmatrix}$.

El prodòt èd coste matris a val

$$M = M_5 \cdot M_4 \cdot M_3 \cdot M_2 \cdot M_1 = \begin{bmatrix} 0 & 20 \\ -0,05 & 0,5 \end{bmatrix}$$

La posission y_2 dèl ragg an seurtìa a l'é dàita da $y_2 = 0y_1 + 20\varphi_1$ e sòn an dis che se $\varphi_1 = 0$, vis-a-dì pér tuti ij ragg paraléj a l'ass òtich, la seurtìa a l'é sempe a 0 (pont andova a-ié 'l feu). L'àngol fàit dal ragg an seurtìa a val $\varphi_2 = -0,05y_1 + 0,5\varphi_1$ e sòn an dis che pér $\varphi_1 = 0$, vis-a-dì pér tuti ij ragg paraléj a l'ass òtich, l'inclinassion dèl ragg èd seurtìa a l'é proporsional a la posission y_1 d'ariv an sla lente , com as peul sùbit vèdde da le geometriè disegnà an figura, considerand él triàngol ABC.

Sistema periòdich

I disoma "periòdich" un sistema fàit da un sot-sistema arpetù vàire vire an cascà. A fan part èd costi sistema, èdcò ij sistema che a son përcorù vàire vire, an manera ciclica, da un ragg èd lus.

I pensoma donca a na série 'd m sistema òtich tuti istéss, traversà da un ragg che a l'avrà na dàita posission inissial con un dàit àngol d'incidensa, su cola che a peul esse considerà la surfassa d'intrada al sistema. L'istéssa còsa a càpita pér un sistema òrich che as treuva fra doi spécc che as armando 'l ragg l'un con l'àutr. An sto scond cas un sistema unitàri a l'é dàit da un gir complét anans e andaré. I podoma consideré com intrada 'l ragg che a seurt dal prim èspécc e coma seurtìa l'istéss

ragg dòp èl prim gir. Pér nòstre considerassion i consideroma la situassion ilustrà an figura 34, che a l'é 'dcò na manera pér mostré n'àutra aplicassion dla técniça dle matris èd trasferiment. A l'é ciáir che la matris èd trasferiment dij sistema unitari a l'é sempe l'istéssa.




Figura 34 - Sistema òtic periòdich.

Dovrand le notassion sòlite, i podoma dì che la matris èd trasferiment che a corispond ai prim m sistema unitàri a sarà m vire la matris d'un sistema. Donca :

$$\begin{bmatrix} y_m \\ \varphi_m \end{bmatrix} = \begin{bmatrix} A & B \\ C & D \end{bmatrix}^m \begin{bmatrix} y_0 \\ \varphi_0 \end{bmatrix}$$

As peulo èdcò fé ij cont pass pér pass, giusta aplicand, an manera iterativa, le doe equassion: $y_{m+1} = A y_m + B \varphi_m$; $\varphi_{m+1} = C y_m + D \varphi_m$, comensand dal cont èd y_1 e φ_1 a parte da y_0 e φ_0 , e peui contand èd y_2 e φ_2 a parte da y_1 e φ_1 , e via fòrt.

A peul esse interessant trové n'espression general pér la coordinà y_m , sensa preocupésse dl'àngol φ_m . Sòn a serv cand a l'é necessari savèj se 'l ragg a resta confinà ant èl sistema, qualonque a sia m , ò se a tira a scapé.

Trajetòria armònica e trajetòria periòdica

Da j'equassion ch'i l'oma scrivù sì dzora i podoma comensé a arcavé φ_m da la prima . I otnoma: $\varphi_m = \frac{y_{m+1} - A y_m}{B}$. Son a val èdcò se i sostituima m con $m + 1$ e $m + 1$ con $m + 2$, e as oten: $\varphi_{m+1} = \frac{y_{m+2} - A y_{m+1}}{B}$. Adéss i sostituima coste espression ant la sonda dj'equassion èd trasferiment, e i otnoma:

$$\frac{y_{m+2} - A y_{m+1}}{B} = C y_m + D \frac{y_{m+1} - A y_m}{B} \quad \text{e da sì}$$

$$y_{m+2} = B C y_m + D y_{m+1} - D A y_m + A y_{m+1}$$

$$y_{m+2} = (D + A) y_{m+1} - (DA - BC) y_m$$

I consideroma che $DA - BC$ a l'é 'l determinant dla matris èd trasferiment d'ogni unità dël sistema, e a ven còmod buté che $F^2 = \det[M] = AD - BC$ e che $b = \frac{A + D}{2}$, an manera che i l'oma:

$$y_{m+2} = 2b y_{m+1} - F^2 y_m$$

che a l'é la relassion d'arcorenza dla posission dël ragg. N'equassion dë sto tipo a peul esse arzolvùa an manera iterativa, calcoland prima la posission y_1 da la posission y_0 con la matris M , e peui da y_0

e y_1 as treuva y_2 , e donca da y_1 e y_2 as treuva y_3 , e via fòrt, ma sòn a arzolv nen nòstr problema d'avèj un critéri pér savèj se 'l ragg a l'é confinà opura nò, qualunque a sia m . I dovoma donca trové n'espression general pér y_m .

Pér sto tipo d'equassion, se n'espression pér y_m a la sodisfa e a sodisfa le condission inissiaj, antlora as trata 'd l'ùnica solussion. An nòstr cas as peul prové con na solussion dël tipo $y_m = y_0 h^m$, andova h a l'é na costant.

Se i andoma a sostituì an nòstra equassion i trovoma: $y_0 h^{m+2} = 2b y_0 h^{m+1} - F^2 y_0 h^m$ e se i dividoma tut pér $y_0 h^m$, i otnoma $h^2 = 2bh - F^2$ vis-a-dì $h^2 - 2bh + F^2 = 0$

Nòstra expression general $y_m = y_0 h^m$ a l'é donca solussion dl'equassion se 'l valor h a sodisfa a l'equassion dlë scond gré sì dzora. La solussion dl'equassion algébrica dle scond gré a l'é

$$h = b \pm \sqrt{b^2 - F^2} = b \pm j\sqrt{F^2 - b^2}$$

A sta mira i podoma antroduve la variàbil angolar $\vartheta = \arccos \frac{b}{F}$, e parèj $b = F \cos \vartheta$ e 'dcò che $\sqrt{F^2 - b^2} = \sqrt{F^2 - F^2 \cos^2 \vartheta} = F \sqrt{1 - \cos^2 \vartheta} = F \sin \vartheta$. Donca, a sta mira, $h = F(\cos \vartheta \pm j \sin \vartheta)$, vis-a-dì $h = F e^{\pm j\vartheta}$.

Nòstra expression pér y_m a dventa $y_m = y_0 F^m e^{\pm jm\vartheta}$. Coste a son doe solussion (relative ai doi segn), e as peul scrive na solussion general coma combinassion linear dle doe. Costa peui a peul esse sempe butà ant la forma:

$$y_m = y_{\max} F^m \sin(m\vartheta + \vartheta_0)$$

andova y_{\max} e ϑ_0 a son costant che as derivo da le condission inissiaj.

Adéss i doma n'uciada al fator F che, com i l'oma vist, a l'é la radis quadrà dël determinant dla matris èd trasferiment relativa a al sistema òtich unitari.

As peul verifiché che 'l determinant èd coste matris, qualunque a sia 'l sistema òtich che as arferìssò, a val sempe 'l rapòrt dj'indes d'arfrassion del mojen d'intrada n_1 an sèl mojen èd seurtìa n_2 . Donca i l'oma sempe che $\det[M_1] = \frac{n_1}{n_2}$, e se doi sistema a son colegà an cascà, èl mojen d'intrada

dlë scond a l'é l'istèss mojen èd seurtìa dël prim, e donca $\det[M_2] = \frac{n_2}{n_3}$. I savoma che èl determinant èd na martis prodòt èd doe matris a l'é èl prodòt dij determinant dle doe matris, e an sto cas i l'avriò $\det[[M_1][M_2]] = \det[M_1] \cdot \det[M_2] = \frac{n_1}{n_2} \cdot \frac{n_2}{n_3} = \frac{n_1}{n_3}$, e donca 'ncora sempe 'l rapòrt fra l'indes d'arfrassion dël mojen inissial e l'indes d'arfrassion dël mojen final.

I podoma sens'èutr dì che pér un sistema dël tipo che i stoma vardand, i l'oma quasi sempe che mojen inissial e final a son j'istéssi, e donca $\det[M] = 1$ vis-a-dì $F = \sqrt{\det[M]} = 1$. Nòstra equassion èd prima a dventa antlora giusta:

$$y_m = y_{\max} \sin(m\vartheta + \vartheta_0)$$

A sta mira i l'oma la manera 'd savèj se 'l ragg a l'é confinà andrinta al sistema opura prima ò peui a seurt dal sistema. La posission dël ragg, dàit da st'espression, a l'é "sinusoidal" se l'àngol ϑ a l'é real. Dal moment che $\vartheta = \arccos b$ (vist ch'i l'oma supòst $F = I$), la condission che ϑ a sia real as traduv ant la condission che a sia $|b| \leq 1$, che a echival a dì $\frac{|A + D|}{2} \leq 1$.

Sta condission a l'é cola pér na solussion stàbil. An sto cas as dis che la "*trajetòria*" dël ragg a l'é "*armònica*". Se 'l mòdul èd b a fissa pì gròss che 1, antlora la solussion a sarà iperbòlica, e donca a 'ndarà a l'anfinì (prima o peui y_m a seurtrà dal sistema, comunque largh a fissa). Èdcò l'àngol φ_m fait dal ragg a l'é na fonsion dl'istéss tipo, e as peul scrive:

$$\varphi_m = \varphi_{\max} \sin(m\vartheta + \vartheta_1)$$

andova a ventrà che φ_{\max} a sia cit a basta pér podèj apliché le régole dij ragg parassiaj.

La trajetòria dël ragg, oltra che esse armònica, a sarà 'dcò "*periòdica*", se a-i é un nùmer antregh s tal che, pér ògni m , a vala l'espression $y_{m+s} = y_m$, vis-a-dì se a intervaj èd s sistema òtich unitari y a arpija jè stéss valor.

Arsonador òtich

I foma n'esempi che a peul vnì a taj parland peui èd laser (ant la session "eletrònica"), d'un sistema che a peul esse considerà "*anfinì*", giusta fait da un mojen omogéni butà fra doi spécc angavà, che as armando l'un con l'àutr un ragg luminos. Se 'l ragg a seurt nen dal sistema an peul consideré che a përcora n'anfinità 'd sistema elementar fait da né spassi d (distansa dij doi spécc), né spécc angavà, ne spassi d , n'àutr espécc angavà. A sta mira a intra ant él sistema elementar sucesiv, identich al prim. An pràtica donca a përcor m vire l'istéss sistema. Se i consideroma nen le pèrdite i l'oma che $m \rightarrow \infty$.

I butoma che lë spécc 1 a l'ha ragg R_1 e che lë spécc 2 a l'ha ragg R_2 , la distansa a l'é d , e i consideroma válida la posission èd ragg parassiaj. Is arferima a figura 35.




Figura 35 - Studi dle condission pér n'arsonador òtich

I podoma scrive la matris èd trasferiment èd na cela elementar fàita da distansa d , spécc 2, distansa d , spécc 1. Com i l'oma vist, i foma 'l prodòt dle martis partend da drita. I l'oma $[M] = \begin{bmatrix} 1 & 0 \\ 2/R_1 & 1 \end{bmatrix} \cdot \begin{bmatrix} 1 & d \\ 0 & 1 \end{bmatrix} \cdot \begin{bmatrix} 1 & 0 \\ 2/R_2 & 1 \end{bmatrix} \cdot \begin{bmatrix} 1 & d \\ 0 & 1 \end{bmatrix}$. Èd costa matris an anteressa conòsse A e D pér trové l'espression èd b .

Fasend ij cont as treuva che ant la matris prodòt èl termo A a val $1 + \frac{2d}{R_2}$ mentre 'l termo D a val $\frac{2d^2}{R_1} + d + \frac{2d}{R_1} + 1$ e donca, dòp quàich passagi, as treuva che:

$$b = \frac{A + D}{2} = 2 \left(1 + \frac{d}{R_1} \right) \left(1 + \frac{d}{R_{21}} \right) - 1$$

Èl ragg a l'é donca confinà se $|b| \leq 1$, e donca se $\left(1 + \frac{d}{R_1} \right) \left(1 + \frac{d}{R_{21}} \right) \leq 1$. I arpijroma sto discors cand i parleroma èd laser (ant la session "eletronica").